


佛昇忉利天為母說法經

中

百卅八
被六

48160

83



元祿九年丙子二月日重脩

皇圖永固 帝階級昌

佛日增輝 懋合輪常轉

山城州天安寺法金剛院置



佛昇忉利天為母說法經卷中

被

西晉三藏法師竺法護譯

月氏天子復白佛言唯然世尊至未曾有菩薩大士所行難及如是像類觀察諸法志於所趣終始沒生坐起語言亦無想念佛言譬如天子幻師所化來往周旋坐起經行而出言教彼無想念如是天子其有曉了諸法如幻普現五趣不有所生彼則無想其菩薩者不念於生亦無所起用本願故有所建立現有所生天子復問如尊所教而言菩薩不念所生亦不往生去何大聖如來至真愍哀垂念所生之親上忉利天一時三月如來不為



從王后摩耶而由生乎佛告天子菩薩不從
王后摩耶所生常應如法天子又問如來至
真云何生乎佛言天子如來則從智慧度無
極生設人觀察推其本末過去當來現在諸
佛誰爲母者則當了之智慧度無極是其母
也所以者何天子其三十二大人相非從摩
耶而所生學大智慧真諦之誼乃能致此自
然成就如來之身其十力者不從王后摩耶
而生本時奉行智度無極得十種力四無所
畏十八不共諸佛之法亦復不從王后摩耶
而生大慈大悲無見頂及不虛見佛眼佛慧
佛之辯才知人心念所從來生神足善權如

是比類不可限量皆因智慧所度無極所以
如來名曰為佛斯諸功德悉為不從王后摩
耶而生天子當知悉從大智度無極行學此
道品如來因斯致如是像無量佛法如來弘
德緣是之故名曰如來是故天子當作斯觀
如來則從智慧度無極生不因王后摩耶所
生天子又問唯然世尊智度無極法無有母
亦無所生亦無所滅云何世尊智度無極而
生如來佛言天子因其法故号曰如來其彼
法者則無有生亦無有終不生不滅其無有
生無終沒者不起不滅斯無色法則為智度
無極所生以故名曰智度無極生於如來其

所生者都無所生亦不終沒亦無所起佛言
天子其不生不沒不起不滅是則名曰智度
無極之處所也智度無極者如有所生如有
所行而智度無極者未曾有生亦無所行天
子又問唯然世尊智慧有想有分別乎而依
智慧如有所生如有所行佛言天子智慧無
想亦無分別假使智慧而有所想有分別者
則爲不行智慧之事所以者何有所想念有
所見者則不應行也設於智慧無所思想無
所分別彼能名曰奉行智慧又問世尊何謂
依行荅曰天子其依行者無所言取何所依
乎佛語天子無言取者則以放捨三界所生

其取言者則便不離三界所生是故天子演
此教耳其無言取何所依行而生三界今有
所依天子又問云何世尊爲諸聲聞講說經
法度三界乎佛告天子吾爲聲聞欲界因緣
而說經法又如來身不得欲界於色無色界
爲諸聲聞而演經典如來不得色無色界之
所處亦無所度而聲聞衆度於欲界佛亦不
得色無色界而聲聞衆超度過出色無色界
又復天子不得三界不倚三界計於空無柔
順之法不順欲界於三界中而無所慕生於
三界亦無所生不知所趣天子欲知所謂度
者賢聖之教但假言耳推於正義無有度者

無往無反所以者何觀一切法無有度者譬如虛空究竟自然無有生者亦無所著無有作者亦無所有亦無不有觀一切法亦當如斯於是世尊說是語時彼諸天衆七万二千天子遠塵離垢諸法法眼生万六千天子宿殖德本悉發無上正直道意千菩薩德本普具得不起法忍佛之威神令其穢上自然有華自管未有各取此華供養如來應時彼華普悉徧布忉利天上尔時天帝前白佛言吾未曾見如此輩華族姓子等奉如來者月氏天子報天帝釋拘翼且聽今所散華如來上者衆人未曾見斯聖尊所以者何所因心見

如來者彼心忽然已過去滅而不可見是故
拘翼有所見者一切諸法皆爲本空本所不
見拘翼又問天子今爲見如來乎荅曰見矣
拘翼察之假使如來有色有爲乃當見耳設
使如來有痛癢思想生死識者吾當見之如
來無色痛想行識亦無合會亦無所有五陰
法想則無有想不可色觀又復向者拘翼所
云若見如來乎如今如來見於我身吾覩如
來亦復如是又問天子云何如來見尔身乎
天子荅曰如來在前便可啓問時天帝釋前
白佛言云何世尊見於天子世尊告曰不以
色見不以痛癢思想生死識見不見過去當

來現在亦不以見凡夫之法亦復不離凡夫
之法不見所學及與不學亦不學成究竟諸
法不見羅漢法不見聲聞亦不以見緣覺之
地無緣覺地佛之所見為如此也其作斯觀
則為正觀其正觀者則無所見其無所見則
平等觀不為邪觀拘翼欲知如來所觀如斯
無異如是觀者普見一切名曰一切審觀是
故如來名曰為佛如來所興不壞法界於意
云何如來所見如是法者為見何等答曰世
尊如是如來不見名号亦無有色於此所察
則無法數無所興造又復問曰唯然世尊如
佛所見月氏天子見如是乎答曰拘翼其有

逮得不起法忍菩薩行者於諸法界隨順住
者法不見法則無所有為自然法又問世尊
月氏天子得法忍乎佛告拘翼汝以自問月
氏天子當為發遣於是天帝問月氏曰仁者
為得不起法忍乎天子答曰於拘翼意無所
從生有發起乎答曰不也報曰設無從生不
有發起云何逮得不起法忍一切法界悉無
所起此之謂也其法界者不起不滅亦無所
得時天帝釋心自念言如今天子有所講說
以為逮得不起法忍以為親近無上正真之
道月氏天子即知帝釋心之所念報天帝曰
拘翼欲得法忍者不為親近無上正真道其

不有起法忍乃能親近無上正真之道又問
天子何故說此荅曰有所得者則墮顛倒亦
無所得其道心者無有成覺不起忍者是曰
無所從生其無所起乃成正覺又問天子道
當何求荅曰拘翼其道心者當於己身自然
求之又問其己身自然之者當於何求荅曰
其法不生亦無生者亦無所生當於彼求當
造斯求求如求意不求名稱而無所求則無
所求則無所任時天帝釋前白佛言至未曾
有天中之天月氏天子深入智慧巍巍難限
於何終沒而來生此於斯沒已當於何生月
氏天子荅天帝曰假使幻士有所變化為男

爲女爲於何沒而來生此於是沒已當復所
趣荅曰化者無所至趣其化者無有沒生所
以者何化者無想荅曰拘翼設使無想云何
如是斯幻化人往至于彼沒來生斯於此沒
已當生某處設有斯念則非明智人所嗤笑
荅曰如是天子誠如所去今者拘翼所發問
者亦復如是一切諸法悉爲如幻而問如來
今此天子於何所沒而來生此沒斯何趣於
意去何如幻所化寧有去來豈可得見沒所生
乎荅曰不也所因化者欲有所興有所造乎
荅曰無有所作報曰如是其曉了一切諸法
皆如幻化則能示現去來沒生彼雖現此亦

無想念亦無所作於意去何其於夢中覩色
若聞聲者鼻所嗅香口所嗜味身遭細滑心
所識法寧可謂之實有所有答曰不也天子
報曰如是拘翼其有曉了諸法如夢如自然
者有所見聞心於諸法無所染汙亦不離塵
亦無所求亦不憂感如所聞法悉分別之爲
他人說於諸言聲亦無所著時天帝釋前白
佛言唯然世尊月氏天子不得所生不沒不
生當以何義開化衆生群黎有生而有終沒
於聲聞之地不生不沒不生不沒非菩薩地
云何菩薩之行當在生死遊無央數億百千
劫佛告天帝其有菩薩逮得成就不起法忍

不念於生亦無終沒猶如羅漢滅度以來積
於百年所以者何觀察菩薩亦復如是菩薩
者無吾我想無他人想菩薩所行又復過彼
不念於生無終沒想無有吾我他人之想皆
悉滅度一切諸法無有本末假使不了於是
法者則無所覺大悲菩薩設無數劫億百千
劫遊於終始不以懈倦譬如男子於四衢道
燒大屋宅無所復慕行大慈者亦復如是不
惜身命在於五樂棄捐之去於所樂欲如遠
大火在於火中悉能忍之其身不燒於意云
何其所作爲難不乎荅曰甚難天中之天
佛言拘翼菩薩所作復過於此度脫一切諸

欲塵垢而現於生教化群黎是故當觀菩薩
大士超越一切聲聞緣覺逮得無上正真之
道爲最正覺尔時佛告天帝向者仁問於何
所没而得生此聽佛所說東方去斯九十二
億百千佛土而有世界名曰積寶其國有無
央數衆寶樹木枝葉華實各各別異經行遊
觀棚閣講堂悉用七寶彼國土地悉紺瑠璃
以無央數百千衆寶合成積寶世界佛号寶
場威神超王如來至真等正覺現在說法其
佛國土無有二乘聲聞緣覺之所教業純諸
菩薩具足如普周滿佛土其佛說法一會時
三十六億菩薩逮得不起法忍衆適得忍尋

則踊身在於虛空四丈九尺動於三千大千世
界則無央數七寶百千蓮華自然布地無不
周接即從虛空詣他佛土奉覲異國如來正
覺稽首歸命諮問經法聽所說誼其佛興來
以十二劫晝夜各三講說經法以是故拘翼
當作斯觀其佛之界諸菩薩衆不可計億無有
損耗衆寶積聚佛之國土無異異名無有山林
溪谷諸淵無談語者無有衆患羅漢緣覺無
食飲者所以者何斯諸菩薩皆以樂法悅豫
爲食今此天子從積寶世界沒來詣此處切
利天故來見佛稽首歸命諮問經典爲無數
人演斯經法廣解其誼又復欲令諸餘菩薩

具足興發於斯法忍佛言天帝月氏天子佛
欲釋命當護正法受持奉行如來滅度之後
最於末世法欲盡時當住此閻浮提於彼世
時當授人民如是比像深妙之法優奧無量
精進將養化不可計億百千人住斯法忍法
沒盡後人間終沒生兜術天弥勒菩薩所啓
受於此諸佛世尊微妙之道化於無量百千
天子立無從生或發無上正真道意弥勒菩
薩成正覺時住閻浮提十歲供養弥勒如來
及諸弟子與二萬人俱捨家之地離家爲道
行作沙門啓受經法盡其形壽常持正法佛
滅度後而以此法將濟群生悉當復值於斯

賢劫千佛興者次第供養九百九十六佛世
尊悉於大聖淨修梵行過七十五江河沙劫
逮得無上正真之道爲最正覺号白日曜如
來至真等正覺其佛土名一切具足於是月
上天子謂月氏曰於斯世尊授仁者決當成
無上正真之道而今如來獨與歡豫偏見愍
念而授決乎月氏天子荅月上曰如來至真
永無所欲亦無所難亦無疑結假使授決無
所希望若有菩薩學開士行以故如來而授
決耳何因如來獨當歡豫偏見愍念而授決
乎又問天子當何以歡豫之信當於信求又
曰假使於心而想心者計於彼人無歡信者

無所受取無受取者第一歡豫計於彼信其
無瑕穢無歡豫者乃為信樂若於言辭無所
言者乃為信樂彼則未曾無歡豫信也亦無
結恨是故天子假使有人求歡豫信便當修
行無言辭法所精進行如無所行亦無不行
無憂無喜所以者何其法界者亦無有行亦
不不行不進不怠月上天子謂月氏曰所可
名曰菩薩學者為何謂乎月氏荅曰所謂菩
薩學者則無有身亦不護體又無有舌亦不
護口又無有心亦不護意是為菩薩第一之
學也所謂學者其無所受亦無所行若無所
起亦無不起是為菩薩學也又復問曰仁者

學斯如來授決乎荅曰天子吾不學此而見授決所以者何學如此者不得吾我及我所耶其不念知有所學斯名曰學也天上世間不能得短亦無有失若有念言我有所學則不爲趣於正業也不逮平等用自謂言我所學故又問曰以何等事謂逮平等也荅曰天子假使行者不上不下不處中間不著所行不有所作有所行者而無所造是菩薩行其作斯念是爲尊法此卑賤法於斯諸法曉了平等不爲二念如是行者謂逮平等又問曰於今仁者逮何等法乃爲如來所見授決月氏荅曰亦不蠲除凡夫之法亦不逮成諸佛

之法如來以此授吾長之決吾於是法無所斷
除又於諸法亦無所得故見授決又問曰計
如是者愚真凡夫悉當得決所以者何亦不
蠲除凡夫之法斯則名曰爲凡夫矣焉致佛
法又重問曰何故解凡夫法乎月氏荅曰吾
以空義爲諸法界解佛法耳其本際者實無
有本也謂空法界可滅乎荅曰不能也本際
無本豈可獲乎荅曰不也是故天子吾說此
言亦不滅除凡夫之法亦不逮成諸佛之法
如來以此授於吾決又復問曰空與法界本
際無本有言辭乎荅曰無也假使空與法界
本際無本無有言辭道無言說於今云何授

仁者波荅曰天子今授吾波猶如空義諸法
之界本際無本是爲諸法之所歸誼如法無
法受波亦如授別亦如授別竟者亦復如是
等覺亦如逮成無上正直之道亦復如是於
是月上天子前白佛言唯然世尊月氏天子
入深智慧巍巍難及佛告天子菩薩以逮成
法忍者其法如是有所分別若發道誼演經
典者解說一切法界之事又其法界所可講
說亦無言辭宣暢示衆所以者何理於法界
無有言辭亦無所說計如法界人界亦如如
衆生界佛界亦如佛界法界亦如假使菩薩
入此誼者則能獨立不從他受

佛昇初利天為母說法經卷中

被

被

古得反
衣襟也

痛癢

下音養

蚩笑

上尺之反
或作嗤

嗅

鼻同

許

救

嗜味

上音貪

四

下音徼

棚閣

上音步

紺

反

古

暗

淵

烏

反

